

**Kuala Lumpur-Moscow perkukuh hubungan
Astro Awani
13 November 2018
Harits Asyraf Hasnan,**

SINGAPURA: Hubungan Malaysia-Rusia terus diperkukuh hasil pertemuan Perdana Menteri, Tun Dr Mahathir Mohamad bersama Presiden Rusia, Vladimir Putin.

Pertemuan yang berlangsung dalam selingan Sidang Kemuncak ASEAN Ke-33 itu menyaksikan kedua-dua pemimpin berbincang pelbagai isu berkepentingan bersama.

Putin dalam ucapan aluannya berkata beliau berpuas hati dengan hubungan dua hala antara Kuala Lumpur-Moscow.

Malah, beliau turut memaklumkan berkenaan peningkatan jumlah perdagangan kedua negara pada lapan bulan pertama tahun ini.

“Banyak lagi yang boleh kita lakukan,” katanya pada pertemuan yang dianjurkan beliau itu.

Sementara itu, Dr Mahathir dalam ucapannya turut berharap perdagangan dua hala kedua negara turut dapat dipertingkatkan.

“Perdagangan antara kita cukup baik, namun ia boleh ditambah baik.

“Kita telah membeli beberapa pesawat daripada Rusia dan kami perlu belajar bagaimana untuk baiki dan mengekalkan pesawat itu,” katanya.

Beberapa isu lain dijangka mengambil tempat pada perjumpaan itu termasuk usaha Malaysia membawa keadilan kepada mangsa dan keluarga pesawat malang, Malaysia Airlines, MH17.

2018Astro Awani Network Sdn. Bhd.

(535275-D) All Rights Reserved.

Source: <http://www.astroawani.com/berita-malaysia/kuala-lumpur-moscow-perkukuh-hubungan-191038>